

9. oktober 1998

UKA 1998/22

**Nioqqutissanik eqqussuinermi akitsuutit pillugit Inatsisartut inatsisaata  
allanngortinneqarneranik**

**Inatsisartut inatsisassaattut siunnersuut**

**pillugu**

**Inatsisartut Akileraartarnermut ataatsimiititaanit**

**ISUMALIUTISSIISSUT**

**Siunnersuutip aappassaaneerlugu suliarineqarnissaanut tunniunneqartoq**

Suliassamik suliarinninnermi Inatsisartut Akileraartarnermut ataatsimiititaanit  
peqataapput

inatsisartuni ilaasortaq Karl Lyberth (S), siulittaasoq  
inatsisartuni ilaasortaq Laannguaq Lyngø (S)  
inatsisartuni ilaasortaq Siverth K. Heilmann (A)  
inatsisartuni ilaasortaq Otto Storch (A), Knud Sørensenimut sinniisussatut  
inatsisartuni ilaasortaq Manasse Berthelsen (IA)

Inatsisartut Akileraartarnermut ataatsimiititaat 25. september aamma 7. oktober 1998  
ataatsimiimmat Nioqqutissanik eqqussuinermi akitsuutit pillugit Inatsisartut  
inatsisaata allanngortinneqarneranik Inatsisartut inatsisassaattut siunnersuut  
suliarineqarpoq. Suliarinninnerminut atugassatut paasisutissanik  
Aningaasaqarnermut Ineqarnermullu Naalakkersuisumit paasisutissanik  
ataatsimiititaq pissarsiniarsimavoq.

Aallaqqaasiutitut Akileraartarnermut ataatsimiititamit oqaatigineqassaaq  
ataatsimiititamit pingaartinneqartoq nioqqutissanik eqqussuinermi akitsuusiineq  
imatut pissasoq nunatsinni namminermi tunisassiarineqarsinnaasut sapinngisamik  
annertunerpaatinniarneqassallutik, taamaaliornikkut suliffissaqartitsineq nunattalu  
avammut nioqquteqarnera iluaqusiivigineqarsinnaaqullugit.

Taamaammat nersutit ilivitsut affallu neqaasa, sullivinnit sullissivinnillu, neqit  
aggorneqarnissaannut atortunik akuerisaasunik peqartunit, eqqussorneqartut

akitsuussivigineqartarnerisa peerneqarnissaa Akileraartarnermut ataatsimiititamit tamakkiisumik isumaqatigineqarpoq.

Nersutit ilivitsut affallu akitsuuserneqartarnerisa peerniarneqarnerata siunertaraa Kalaallit Nunaanni suliffissaqartitsiniarnerup siuarsaavigineqarnissaa, taamaaliornikkut neqinik Kalaallit Nunaanni agguisarnermik suliaqarneq kajungernerulerarsinniarlugu.

Taamaammat Akileraartarnermut ataatsimiititamit siunnersuutip suliffissaqartitsiniarnermut sunniutigisinnaasai misissuiffigineqarput, siunnersuummut tusarniaanermi akissutitut tiguneqartut naliliivigineqarnerisigut.

Tusarniaanermi akissutigineqartut tunuliaqutaralugit siunnersuutip suliffissaqartitsiniarnikkut sunniutissaviisa eqqoqqissaartumik isummerfiginissaat ajornakusoortuuvoq. Ataatsimulli isigalugu naliliisoqarpoq nersutit ilivitsut affallu neqaat eqqarsaatigalugit eqqussuineq annertusissasoq, tamatumalu malittaaniq suliffissaqartitsineq annertusissasoq.

Akileraartarnermut ataatsimiititamittaaq misissuiffigineqarpoq suliffeqarfiit qassit, neqinik agguinissamut atortussaateqareersut, taamaaliornissamut akuerineqarsinnaanersut, aamma neqaarniat ilinniartitaanerannut ilinniarteqqinneqartarnerannullu periarfissat pillugit.

Naalakkersuisunut ilaasortamit ilisimatitsissutigineqarpoq, ilisimatinneqarsimalluni Kalaallit Nunaanni sulliviit 20 missaannik amerlassusillit nersutit ilivitsut affallu neqaannik agguisarnermik naammassinissinnaassasut. Matumani pineqarput neqaarniarfiit, pisiniarfiit angisuut neqaarniarfittallit sullissiviillu.

Ilinniartitaanermut ilinniarteqqiisarnermullu periarfissat pillugit Naalakkersuisunut ilaasortaq ilisimatitsivoq neqinik agguisarneq INUILI-p inuussutissalerinermut ikiortinik ukiunik marlunnik sivisussusilimmik tunngaviusumik ilinniartitsisarneranut ilaasoq. Ukiuni marlunni tunngaviusumik ilinniartitaanermut nangissutitut neqaarniatut ilinniarneq Danmarkimi pisarpoq. Naalakkersuisunut ilaasortaq ilisimatinneqarsimavoq INUILI maannakkorpiaq allangortiteriffigineqarlunilu annertusaavigineqartoq, neqaarniarfittullu inimik nutaamik 1999-imi aasaanerani atuilernaartoq. Taamaalilluni ilinniarfik initigut sulisoqarnikkullu periarfissaqalersussaavoq ilinniartitaanermik ilinniarteqqiisarnermillu, nersutit neqaasa nunatsinnut eqqussorneqartut annertusineqarsinnaanerannut atasumik pisariaqarneratut ingerlatsinissamut, tamannalu siunniulluinnarneqartoq. Piffissami INUILI-p atuuffigisimasaani, tassalu 1990-ikkunni, neqaarniatut ilinniartut marluk ilinniagaqarnermikkut naammassinissimapput, sulilu tallimat ilinniagaqarnermik ingerlataqarlutik.

Akileraartarnermut ataatsimiititamit naatsorsuutigineqarpoq nersutit nassullit neqaat ilivitsut affallu, aamma puulukit nujitsut neqaat eqqussorneqartut, eqqussuinerneq akitsuut atorunnaarsinneqarpat, amerlissasut. Tamatuma peqatigisaanik Akileraartarnermut ataatsimiititamit naatsorsuutigineqarpoq neqit naammassillugit

suliarineqarsimasut, taakkununnga ilanngullugit neqit aggukkat, eqqussorneqarnerat annikillissasoq.

Akileraartarnermut ataatsimiititaq isumaqarpoq tamanna nunatta niuerneragut pitsaasumik sunniuteqassasoq, tunisassiammi naammassillugit suliarineqarsimasut kilomut akiat nersutit ilivitsut affallu neqaannit kilomut akiusumit anginerummata.

Akileraartarnermut ataatsimiititaq isumaqatigiittoq matumuuna Inatsisartunut inassuteqarpoq nioqutissanik eqqussuinermi akitsuutit pillugit Inatsisartut inatsisaata allangortinneqarneranik Inatsisartut inatsisissaattut siunnersuut akuereqqullugu.

Karl Lyberth  
ataatsimiititami  
siulittaasoq

Laannguaq Lynge (S)

Siverth K. Heilmann (A)

Otto Storch (A)

Manasse Berthelsen (IA)